

10. maji. 2017

Silaannakkut angallannerup tiguneqarnissaa pillugu Naalakkersuisut suleqatigiissitamik pilersitsinissaannut Inatsisartut aalajangiinissassaattut siunnersuut.

(Inatsisartunut ilaasortaq Per Rosing-Petersen, Partii Naleraq)

Siumumiit nuannaarutigaarput siunnersuut matumuuna pineqartoq, tassalu akisussaaffik silannakkut nunarput qulaallugu angallannerup nakkutigineqarnerata tigunissaanut piareersaatit aallartinneqarnissaat, ilaatigullumi suliaq aallartisarnikuuvoq ukiakkut 2015-mi immikkoortoq 166-mi Inatsisartut aaliagernerat, imaattumik qulequtalik:

“Atlantikup avannaata Kalaallillu Nunaata silaannartaasa angallavigineqarnerisa allaffissornikkut aqunneqarnerata nunatsinnut nuunneqarnissaa pillugu naalagaaffeqatigiit Canadami Islandimilu oqartussanut isumaqatigiinniuteqarnissaasa aallartinneqarnissaa siunertaralugu danskit naalakkersuisuinut saaffiginninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Silaannakkut angallattunik nakkutilliineq imminut aningaasatigut, annertunerusumik annikinnerusumilluunniit, nammattuuvoq. Taamaammat nunatsinnut annertunerusumik aningaasartuutaanani akissaaffik taanna ikaarsaartinnissaa aallarnisarsinnaavoq. Akissaaffiup pineqartup nunatsinnut pisinneqarnerata ilaatigut malittigissuaa suliffiit arlaqartut pilersinneqarnerat. Tamanna immiini tunngavik naammaginarpoq.

Nalunngisarput oqaatigissuara, tassalu nunarput piffissaq ungasissoq isigalugu unamminartumiippoq, taamaammat suliffiit aningaasanik isertitsiviusinnaasut nunatsinni pilersinneqarsinnaasut tamaasa aqutissiuunnissaat pisussaaffittut isigisariaqarparput. Uumallumi siunnersuutip tamannarpiaq malittigissagaa naatsorsuutigaarput. Taamaammat aappassaaneerneqartinnagu Sanaartornermut ataatsimiititaliamut innersuupparput ilaatigut naalilersoqqullugu siunnersuummut siusinnerusukkut aaliangiiffigereersumut, tassalu imm. 166 ukiakkut 2015-mi suliarineqartumut qanoq kalluaanersoq imaluunniit qanoq suliat imminnut tapersorsinnaanersut isumaliuutigeqqullugu.

Jens-Erik Kirkegaard.